



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 3

Taruba Hombar tashinung Israel-Hamas ceasefire imlar: Biden

ED-i Delhi CM Kejriwal 8benbuba jaokogo



VOL. XXI ISSUE NO. 136 (ADOK 136) DIMAPUR RASEMNÜ (WEDNESDAY) TSÜKLAI (FEBRUARY) 28, 2024 ₹ 5.00

CM Neiphiu Rio-i 2024-25 atema Rs 905.78 crore deficit budget benok

Kohima, February 27, 2024 (TYO): Nagaland Chief Minister Neiphiu Rio-i Mongulbarnü Rs 905.78 crore deficit budget benokogo.

State Assembly session tenzuka anogo anabuba nung CM Rio-i budget 2024-25 benokdang "gross receipts Rs. 23978.05 crore aser gross expenditure Rs. 23727.88 crore" asadanga bener aru.

Budget 2024-25 ya nübertem asoshi aser tax free lir. Yaküm estimates Rs 23,083.66 dang nungi Rs 644.22 crore agi talila lir, ta CM Rio-i ashi.

Taküm negative balance Rs. 19.83 crore adoktsü anungji financial year 2024-25 nung Rs. 905.78 crore deficit adoktsü ta CM Rio-i ashi.

CM Rio-i budget onük jembidang constituency shia nung Local Area Development Fund (LADF) Rs 1 crore masü saka Rs 2 crore agütsü ta ashi.

"Eastern Nagaland nung alirtem tebilemtü balala atema sorkari kanga tongti süa bilemer. Iba nung ajemdaker PM DevINE kübok Eastern Nagaland asoshi Rs. 180 crore lezmüksür aser iba ajanga terenlok mapa balala nung



February 27, 2024 nü Nagaland Chief Minister Neiphiu Rio-i Assembly nung 2024-2025 Budget benokdang agiba noksa angur.

yariteptsü" ta pai ashi.

"Eastern Nagaland nung alirtemi Centre sorkar ne takhangba kar agüja lir. Onok külemi inyaktsü aser Centre sorkar dang Eastern Nagaland nung khurettem agizüksü jembitsü" ta Rio-isa metetdaksü.

"India sorkari Myanmar den arrtsülen Free Movement Regime (FMR) anentsü lemtetba atema süoki ia bilemer. Arrtsütem ajanga asenok lemsar alir saka natural boundaries ya nisungi latetba dang lir. Iba onük atema shisalemsateptsü nungdaker aser India sorkar dang FMR maneni alitsü jembitsü" ta paisa ashi.

August 3, 2015 nung

Framework Agreement aser November 17, 2017 nung Agreed Position sign sütepba sülen teti atema yimjung angutsü teimla liasü saka tanü tashi Naga yimten ano melatet lir, ta Rio-i ashi.

State sorkari yimjung olemtep nung tiyongtsü nung tongti süa inyaker aser kümtem süa arudang Nagaland assembly-i bangzüng aika renemogo aser civil society organisations ajak aser sendaktepa alirtem den sendentem menogo saka tang

tashi telemtetba kecha magiteti lir ta pai ashi.

"Asen chimurtemia tangar ama linür aser asenokia parnok tarutsü tajung yangera yutsütsüla. Anungji India sorkar aser Naga Political groups-i tekara nung lemtet ka agitsü ayongzüker" ta Chief Minister Rio-i ashi.

CM Rio-i Budget nung telemsa balala indang ashidang Nagaland nung investment promotion aser facilitation agency ka ama inyaktsü atema Investment &

Development Authority of Nagaland (IDAN) tentet ta ashi.

Kibong ka nung aayanga sen bener arur asü nungbo Chief Minister's Universal Life Insurance Scheme ajanga Rs. 2 lakh life insurance coverage agütsütsü ta paisa metetdaksü.

Maneni, kibong asoshi sen bener arur aser kibong nem züngsem 3 shia nem Rs. 2 lakh accidental insurance coverage agütsütsü ta Rio-isa ashi.

Iba scheme kübok Nagaland nung aliba kilen ajak adentsü aser premium menoktsü atema Rs. 15 crore agütsür, ta paisa ashi.

Kümshia Nagaland-i Rs 540 crore endoka power alizüker saka non-payment, tampering ajanga Rs 280 crore akoksar. Sendaktepa alir ajaki iba khuret atema külemi inyaktsüla, ta Rio-i ashi.

Tanü NLA Speaker Sharingain Longkumer-i February 29 nü budget discussion alitsü aser March 1 nü jembiteper agizüksü ta metetdaksü.

Nagaland Assembly nung government bill 3 benok

Kohima, February 27, 2024 (TYO): Mongulbarnü Nagaland Assembly nung sorkar bill asem benok aser iba nung Chief Minister Neiphiu Rio-i "The Nagaland Goods and Services Tax (Eighth Amendment) Bill, 2023" benoka liasü.

July 1, 2017 nungi GST mapa tenzükogo aser iba nung Central Goods and Services Tax (CGST) aser State Goods and Services Tax (SGST) dena lir ta CM Rio-i ashi.

Centre sorkari Central Goods and Services Tax Act, 2017 yanglushiogo aser state sorkartemia State Goods and Services Tax Act nung temelenshi kar asütsüsa akümer, ta paisa ashi.

Legislative Assembly session maliasü aser kanga rongdak asüba agi Nagaland Governor-i October 6, 2023 nü Nagaland Goods and Services Tax (Eighth Amendment) Ordinance, 2023 ozüng kümdaktsü aser ibaji Nagaland Gazette Extraordinary nung metetdaksü, ta CM Rio-isa ashi.

Nagaland Goods and Services Tax (Eighth Amendment) Bill, 2023 ajanga Nagaland Goods and Services Tax Act, 2017 ya tajungba aser tezübaba kümdaktsütsü ta paisa shisem.

Tanü session nung Parliamentary Minister K. G. Kenye-ia "The Nagaland Salaries,

Allowances & other Facilities of the Chief Minister, Speaker, Deputy Chief Minister/Ministers, Leader of Opposition, Deputy Speaker and other Members of the Nagaland Legislative Assembly and Pension for Ex-Members (Sixth Amendment) Bill, 2024" benok.

Bill nung Section 8 nung aliba ama itasentem meyipa reprangshiogo aser iba ya NLA nung House Committee-i ashiba ama lir ta Kenye-i ashi.

Iba ajanga kümshia Rs 1701.51 lakhs endoktsü ta paisa shisem.

Külen, Higher Education Minister Temjen Imna Along-ia "The Establishment of Private University Bill, 2024" benok.

"Nagaland Higher Education system nung quality facilities nungdaka akümba agi state sorkari guideline ka renemtsü nungdak ta bilemer. Nagaland nung Private Universities amenoktsüba Bill ajanga state nung nijatemi tetsükdaktsü melii inyaktetsü" ta Minister Along-ia ashi.

Item ajakji shisadangba sülen iba Bill nung Guidelines for Establishment of Private University Act, 2024 benoker ta paisa ashi.

NLA Speaker Sharingain Longkumer-i bill asemji February 29 nü olemteptsü aser agizüksü atema osang metetdaksü.

Estimated gross receipts and gross expenditure:

A : RECEIPTS	(Rs. crore)
State's Own Tax and Non-Tax Revenue	: 2250.05
State's Share in Central Taxes	: 6940.56
Central Assistance (Grants & Loans)	: 8880.11
Internal Debt (including WMA from RBI)	: 5905.82
Recovery of Loans and Advances by State Govt	: 1.51
Total	: 23978.05
B : EXPENDITURES	
Non Development Expenditure (excluding Servicing of Debt)	: 12163.90
Servicing of Debt (including repayment of WMA)	: 5611.87
Development Expenditure (including CSS etc)	: 5952.11
Total	: 23727.88
C. BALANCE (A-B)	: 250.17
D. PUBLIC ACCOUNT (NET)	: (-)270.00
E. CURRENT TRANSACTIONS (C+D) :	(-) 19.83

NPF-i Naga yimten tebilemtü aser FMR atema süoki ia bilemer

Kohima, February 27, 2024 (TYO): NPF-i Naga yimten tebilemtü aser Indo-Myanmar nung Free Movement Regime (FMR) maneni alitsü atema süoki ia bilemer ta MLA aser NPF secretary general Achumbemo Kikon-i ashi.

Governor indang onük atema motion of thanks nung shilem agia jembidang "Naga Peoples Front (NPF)-i Naga yimten latettsü aser Naga nung aliba tesem ajak ka akümtsü asoshi temulung agütsür" ta Achumbemo-i ashi.

14 buba NLA nung züngsemtemi Naga nung aliba tesemtem ka akümtsü atema bangzüng ka renemtsüla. 1964, 1970, 1994, 2003, 2015 aser 2018 nung trokben tashi iba atema bangzüngtem renemogo, ta paisa ashi.

"Nagaland nung Opposition maliba sorkar nung MLA ajaki Naga yimten tebilemtü latettsü

atema süoki ia bilemer aser asenoki Naga nung aliba tesem ajak ka akümtsü atema bangzüng ka renemba nung aibelen kecha mali" ta Achumbemo-isa metetdaksü.

Assam-Nagaland arrtsü:

Assam den arrtsülen police force talila mapa lezmüksütsüla. Deputy Chief Minister Y Patton-i tawa arrtsülen platoons ana lapoktsüba atema tenüngsang agütsür.

Governor indang onük nung Human-Elephant conflict atema kecha mali anungji iba atema budget nung benoktsü mepishir, ta Achumbemo-isa metetdaksü.

FMR:

Centre-i Indo-Myanmar arrtsü atsüdagtsü inyakba pusemer ta BJP Advisor Imkong L Imchen-i ashiba magizüker. NPF party-ibo arrtsü atsüdagtsü magizüker kechiyong Naga nungeri memulungi asenok lemdanga lir ta pai ashi.

Naga nung political rights atema noktaksü temeten lir aser ibaji Governor onük nunga jembio, ta Achumbemo-i ashi.

Longwa Chief Angh-i Myanmar nung yimtsüng 11 madak yimsü asür aser Angh'er kiji linük ana nung lir. Anungji arrtsü matsüdagtsüla aser NPF-i iba mapa menungiter, ta paisa metetdaksü.

Saisapongbaren:

Sorkari Nagaland nung saisapongbaren asoshi mapa aika inyakba atema tenüngsang agütsür saka employment sectors nunga sports quota tashi itdaksütsü nungdaker ta paisa ashi.

Nagaland sorkari 'Year of Entrepreneurships', 'Year for Farmers' amala ayonga amonger anungji 'Year of Sportsman or Sports Activities' ayonga amongtsüla, ta NPF secretary general Achumbemo Kikon-isa ashi.

Mokokchung & Dimapur nung Polio Immunization atema senden amen



Pulse Polio Immunization (IPPI) day amungtsü aliba atema District Task force on immunization senden ka Deputy Commissioner, Mokokchung Conference Room nung February 27, 2024 nü senden alidang tangokba noksa angur.

Dimapur, Tsüklai/February 27 (TYO): March 3 nü Intensified Pulse Polio Immunization (IPPI) day amungtsü aliba atema District Task force on immunization senden ka Deputy Commissioner, Mokokchung indang Conference Room nung February 27, 2024 nü senden ka mena liasü.

Iba senden nung District Programme Officer, Dr Takosunep-i iba anogo inyaksü mapa indang lemsatepa liasü.

Iba anogo district nung kilen 33,552 awajemtsü aser arishi küm 0-5 tsüngta tanur 5443 shi nem OPV agütsütsü aser iba atema vaccination booths 214 amenoktsü, ta pai metetdaksü.

Iba senden nung Deputy Commissioner, Mokokchung,

Thsuvisie Phoiji menden liasü aser pai civil society organisation, arogo, putu menden aser sendaktepa aliba department tem dang iba IPPI sentong takok ngua agitettsü asoshi amalitep akatsü ayongzüka liasü.

Maneni Deputy Commissioner, Dimapur indang Conference Hall nunga February 27, 2024 nü District Task Force for Immunization on National Immunization Day (NID, Pulse Polio) aser Measles Rubella (MR) elimination programme agia liasü.

Iba sentong nung District Immunization Officer, Rebecca-i ashiba agi, India nung 2011 nungi wild Polio virus puteta mali.

Nagaland nung aliba district

12 nungi district asem nung AFP surveillance standards (NPAFP rate <2) metongtet aser IEC aser mobilization ajanga tila tanur timba awajemtsü mechi March 3, 2024 nü nungi NID maparen balala inyaksü, ta lai ashi.

Tila tanur ajak nem vaccine agütsütsü nükjidong nung March 4-5 anogotem kibok sema vaccine agüja jajatsü.

Iba senden nung mendenpuba aser Deputy Commissioner Dimapur, Tinojongshi Chang-i department ajunga dang measles rubella samadaksütsü atema yaritepsü ayongzüka liasü. Paisa lokti dang nüburtem nem iba indang awareness agütsütsü ayongzüka liasü.

MCTE nung "Fusion Fest" sentong tenzükogo



Mokokchung College of Teacher Education, Mokokchung nung February 27, 2024 nü 'Fusion Fest' sentong tenzükdang P. Tiatemsu, Assistant Professor, Department of Botany, Fazl Ali College ajanga o jembiba noksa nung angur.

Dimapur, Tsüklai/February 27 (TYO): Mokokchung College of Teacher Education nung "Navigating Our Roots" omen nung ajemdaker mezüngbuba "Fusion Fest" sentong February 27, 2024 nü college telungzük nung tenzükogo.

Ibai anogo pezü sentong lir, koba March 1, 2024 nü tembangtsü. Mezüng anogo nung Cultural aser Literary Competitions agia liasü, kong P. Tiatemsu, Assistant Professor, Department of Botany, Fazl Ali College aser Advisor, Arju Centres, Mokokchung tetushi tesemdang ama dena liasü.

Iba sentong nung jembidang pai mapa inyakba yimya, sobaliba indang shisatsü aser 'community life' indang jembiba liasü.

Kibong yimyatem, lokti sentong, skills, arts amala sobaliba yimyatem wazüka ayutsü kanga tongtipang aser itemji tesamar lir, ta pai ashi.

Tarutsü putu nem asen sobaliba tajung indang shisatsü agütsütsü asen mapa lir, ta pai ashi aser kaketshirtem dang meranga inyaksü, takum nung nükjidong alitsü aser lisopur shisatsü alitsü ayongzüka liasü.

Iba sentong nung Dr T. Alemla Longkumer, Principal,

MCTE ajanga pela agizükba o jembi aser Maongsunep Kichu, General Secretary, MCTESU ajanga iba sentong indang teratet lemsatepa liasü.

Sentong nung Onenla Jamir menden liasü, Campus Dwellers Fellowship tir Chongten-i Tsüngrem temoatsü meshia sarasadem aser Imnasenla ajanga "Naga Lima" nungja agütsür shilem balaka agia liasü.

Anogo pezü sentong nungya akhi yimya nung mi aputetba, jepdak jembi, tar nunger otsü ashiba, tarep kenten, indigenous games and sports, stall exhibition and sales amala alitsü.

Meriyan nung banana fibre extraction & handicraft development training agütsü

Dimapur, Tsüklai/February 27 (TYO): Wokha district kübok Meriyan yimdak hopta ka asoshi banana fibre extraction aser handicraft development training agütsüba sentong February 27, 2024 nü tenzükogo.

Iba training ya Shishoi-Oshom- Entrepreneurship Task Force cell (ETF) ajanga Nagaland Tool-Room & Training Centre, Dimapur den lungjemer agütsür.

Banana fibre extraction dak sendakba yimya aser skills angazükdaksütsü aser iba nungi handicrafts yangluba yimya sayutsü nükjidong nung iba training ya agütsür.

Theoretical sessions aser practical demonstrations ayongzüka ajanga iba training nung shilem agirtemi fibre extraction, yarn spinning aser handicraft balala yangluba yimyatem angazüktsü.

Iba training nung Meriyan yimtsüng nungi Tuhutho Co-operative Farmers Producer Organisation aser Lichon Farmers Producer Company nungi shilem agitar.

Iba training yagi yimtaklirtem rongsenketzüng tsütsü lenmang tasen agütsütsü aser pei takum dangar dak memetaloki poksünga alitsü.

Shishoi-Oshom-ETF aser Nagaland Tool-Room & Training Centre, Dimapur lungjemba ajanga entrepreneurship, skill development aser agriculture sector nung lenmang tasen bushitettsü nükla kasa aliba sayur.

Banana fiber agizükba ajanga sen kumdaksüba osettsüset balala yanglutettsü aser ibaji ajanga nüburtem rongsenketzüng tajungba akumtsü aser libajen tajungba wazüka yutettsü.



Tzüdikong Town nung February 26, 2024 nü Women Health Committee Tzüdikong Town-i achayanga 'Health check-up and Orthopedic-medicine' camp ka ayongzüka liasü. Iba camp nung doctor pezü arua manemertem temang repranga liasü.

Wokha nung DTF for Immunization senden amen

Dimapur, Tsüklai/February 27 (TYO): National Immunization Day for Pulse Polio immunization sentong March 3-5, 2024 anogotem agitsü aliba dak sendakba nung iba sentong agitsü atema shisa lemsatepba senden ka Wokha District Task Force for immunization aser Urban Task Force for immunization züngsemtem mena liasü.

Iba senden nung District Programme Officer (UIP/RCH), Dr. Thungchanbeni Patton-i asemnü sentong nung inyaksü mapatem lemsatep aser iba mapang tila tanur arishi küm 0-5 tsüngta alir nem polio booths balala nung oral polio drops agütsütsü ta ashi.

March 3, 2024 nü district kübok tesem balala nung

amenoka aliba booth area nung iba mozü ya agütsütsü aser tanur ajak iba mozü agidaktsütsü mechi March 4 & 4 anogotem ki ajak sema aotsü.

Iba mapang kilen 20,393 awajema tila tanur 10,890 nem mozü ya agütsütsü aser vaccination booth 193 amenoktsü, ta Dr. Patton-i metetdaksü.

Iba senden nung menden SDO (C), Wokha, Nuhuta Tunyi liasü aser pai züngsem ajunga dang immunization atema awareness prokshitsü ayongzüka liasü.

Paisa Colony council chairmen ajunga dang pei aliba tesem nung tila tanur arishi küm 0-5 tsüngta alir ajunga mozü ya agidaktsütsü asoshi ajungmesotsü aser osang sangdongtsü ajungshia liasü.

Tuensang nung Youth Parliament ali

Dimapur, Tsüklai/February 27 (TYO): Nehru Yuva Kendra Tuensang aser District Administration Tuensang lungjemer Town Hall, Tuensang nung February 27, 2024 nü District level Neighbourhood Youth Parliament ayongzüka liasü.

Iba sentong nung ADC Tuensang, Thungchanbemo Tungoe-i jembidang Parliament inyakyim angatettsü asoshi lanurtem atema Youth Parliament ya kanga tongtipang lir ta ashi.

Asen elected members tem asenok tenüng nung oa shilem agir

aser parnok inyakyim metettsü asenok dak tashi lir, ta pai ashi.

Pai kaketshirtem dang lenirtem tenüng sena mekazüi sorkar inyakyim nung shilem agia lenir shidak shima clean election nung shilem agitsü ayongzüka liasü.

ADC Tuensang-isa Clean Election pledges agia liasü.

Iba sentong nung Kishor Barman DYO, NYK Tuensang ajanga Youth Parliament ayongzüka nükjidong lemsatep aser New India, New Initiative onük nung Zerutso Keseizie EAC, Tuensang ajanga o tatsüka jembi.

Enforcement Directorate (ED)-i Delhi CM Kejriwal 8benbuba jaokogo

New Delhi, Tsüklai/February 27 (Agencies): Enforcement Directorate (ED) Delhi chief minister Arvind Kejriwal tibenbuba jaokogo aser pa dang March 4 agency matsüngdang nokdaksü tetuyuba agütsüogo.

Tangbo aginer aliba 2021-22 Delhi excise policy senotsü ochi mashi ken o dak sendakba nung onük balala ashishitü atema

Kejriwal jaokogo, ta ken o jangia alirtemi Mogolbarnü metetdaksü.

ED-i Kejriwal tenetbenbuba jaokba nung pai shilem magiba sülen anogo ka lir ano pa jaokogo. Kejriwal shiba taoba küm November ita mezüngbuba jaoka liasü, pai iba ya oziung alema lir, ta shia ED dang ken o agintsü shiogo.

Kejriwal-i ashiba agi, pa Opposition Indian National

Developmental Inclusive Alliance (INDIA) toksüdaktsütsü atema iba jenjang ya agir. "okadak ajanga oang ta shira ni aotsü.. Parnoki onok indang alliance raksatsüner. Parnoki alliance toksüdaktsüner," ta pai ashi.

Kejriwal-i pa jaokaka tashi mangaba atema ED-i Delhi court ka nung tashishiba agütsüogo. Iba court yagi CM March 16 nü

tashibo okadak tsüngtong arua shilem magitsü atema temelaba agütsüogo. Kejriwal-i Delhi assembly Budget session agia aliba ajanga tsüntong arua shilem magiteter ta shia court nung virtually shilem agia liasü.

2021-22 excise policy dak sendakba nung AAP lenirtemi sübokrem crore 100 agütsü ta ED-i shia arudar. Inyakyim meshidakba

dak sendakba nung lieutenant-governor Vinai Kumar Saxena-i Central Bureau of Investigation-i ken o bushisüngdangtsü atema benokba sülen iba policy ya agina liasü.

Charge sheet trok tashi nung ED-i ashiba agi, iba policy ya Kejriwal-i apitetba lir, ajisiüaka pabo aibelena alir ka ama tang tashibo aija mali.



Government of India

Farmer's interest ensured

Modi Government's Guarantee



Prime Minister Narendra Modi

Aluyimer **crore 9** dak tema nem **16buba** PK-Kisan Samman Nidhi **sen crore** **meyirejang 21** dak tema direct transfer ajanga agütsütsü.

28 February, 2024 at 4:30 pm. Venue: Yavatmal, Maharashtra

PM Kisan Samman Nidhi

- Tang tashi nung aluyimer **crore 11** dak tema nem parnok indang bank account nung **sen crore lakh 3** dak tema inoktsüogo
- Beneficiary aluyimer tem nem installment asem nung **sen 6000** agütsüogo.
- Alima nung DBT project rongnung tulutiba rongnung ka.
- Beneficiaries tem tebilemtsü bentettsütsü asoshi comprehensive grievance redressal mechanism and centralized helpdesk amenokogo.

Modi sorkar indang teinyaktsü tongtibangba:
Aluyimertem nem tashi agütsütsü

Taoba küm 10 tsüngda agriculture budget **ponguben** agi timba kümtsüogo.

MSP ama chiyongtsü jenjang **kaser tesadang** agi timba agütsütsü telemtetba agiogo.

Pradan Mantri Fasal Bina Yojna kübok **aluyimer crore 16** tema nem **sen crore lakh 1.56** agütsüogo.

Pradhan Mantri Kisan Samridhi Kendras lakh 2 dak tema amenokogo.

Aluyimer crore 1.77 shi e-Nam portal nung züngoksemogo, **e-Nam market nung 1389** züngoksemogo.

Watch Programme Live on DD News or DD Kisan Channel



AgriGol

PM-Kisan Helpline No. 155261

For more information on this Scheme Scan QR code





TIR YIMYIM YIMOBILEM (EDITORIAL)

DIMAPUR RASEMNÜ, FEBRUARY (TSÜKLAI) 28, 2024

Asen lima nunga kechi inyaktsü?

Government-i Tuli nung paper mill lapokba aser Longnak nung Fruit Canning Factory lapokba putu to süiogo. Aji oda, asenoki Tuli paper mill aser Longnak Fruit Canning Factory lapokshitsü merangba mapatem to putu yimya memetet inyakba mapa ka liasü ta tangang angateter. Iba jagi Tuli aser Longnak na prongla Nagaland Industry map nungi agienogo aser tangbo tatar senden nunga Tuli aser Longnak indangbo tetetshia metetshir. Atangji, asen Ao lima amshia terenlok tulu arutsüba teimla ola ka tan tatar senden nung Nagaland angh-i agütsüba Foot Hills Road ya Trans-Nagaland Highway küma yanglutsüba osang ya asütsü. Iba lenmang asoshibo, talisa, asen kin nungi lokti tentet lenirtemi kanga nendaka inyakba ajanga ali tazübo tupoka ogo aser lenmang merenemaka Doyang apubo renemer semzükogo. Ajisüaka, lenmang maka ser apuji kechi sütsü? Anungji, iba lenmang ya danga karaa renemer senzütsüsa tangar dang nungibo asenokiang temulung tagütsüba agüja inyaktsüla. Tanga kecha meinyaktsüyonga, gari lenmang dang sademsadema junga yanglutsüba, iba lenmangji amshia senotsü arulen lenmang bushia inyaktsüba jibo nübortemi parnoksa apitetsü. Aji oda, tang state government-i inyaktsü sentong nung aliba ama Trans-Nagaland Highway ya renemtet nungbo asenoki aginü-maginü ta mali Mokokchung district küboka Tzurangkong nungi Tuli lenden tashibo 'Special Economic Zone' akümtsü. Ibaji atema government-i electric tashi peria agütsütsü aser asenoka tangar takar aser temetetertem den külem ser industry tapu balala lapoka mazüngi ali tenzüksü. Item ajakji asenok nükla nung yur Mokokchung Town kümer küm 125 ajungba tenung nung adokba 'Vision Mokokchung 2040' nung lemsatepba onük aser sentongtem mapa küma aotsü atema Mokokchung District Planning aser Development Board-i anir senso ajaki asen lima junga kümdaktsütsü atema bilema meranga inyakra, atangji, asen lima renloktsü atema parliament mesüra assembly nung süoka mejembiyonga lasasa junger alitsü. Asenok mangdangji Mokokchung district ajak ya yimti ka küma tangjema kümdaktsütsü asoshi lir. Ibaji ataloktsü atema tamasa asen lima ajaklen gari lenmang tajung asütsüla aser Kohima-leni train atutsü atema kanga temulung agüja inyakdaksüba ama, asenokia Tuli tashi train lenmang aliba ya Mokokchung tashi tuluba aser tajungba küma yanglur Mokokchung-a Indian Railway map nung tilakabo angutsüsa inyaktsü kanga nungdaka kümogo. Aji oda, koba lima nung kodang gari aser train mazüngi jajatsü tenzükdir, iba jagi nisungtem mazüngi inyakba tamaitüsü sayur aser kodang nisungtem gari aser train nung anogo shia sünga-sünga mener mazüngi jajadir, iba tesem jagi nisungtemji bushia tayimtsü arutsü. Ashiko, asen limai train aruba ajanga mesüra asen lima tesem ka Special Economic Zone akümba agi bendangertem nungoka aita asenok mokseptüsü amai asenoki bilema alitsüa akok, ajisüaka gari nunga, train nunga mesüra tayimtsü nunga tangar bendanger arurtemji Nagaland nung amungtsü mesüra mapa inyaka alitsü atema mapang tatazük ka atema temelaba (ILP) bener arutsü, anungji itemji mittsü asoshiang asenok ket nung inyakyim shitak alitsüla aser iba ozüngji kanga akanga amshitsüla. Ochi o kaji, asenok kijaibo asen lima nung akaba rongsentem ya tagitsü küma mamshitetsü, anungji tangar takar aser temetetertem den külemi külem tajangzük asoshi inyak tenzüksü atema asenok ket nung temzüng ozüng, inyakyim aser temetetba aser tejangraba alitsü nungdaker. Idangji dang asen lima nung mapa inyaker meinyakma adoktsü. Iba Mokokchung Nükla-ji mapa akümtsü asoshi lanurtemi meranga shisatsü aser temetetba bendentsüla, yimsüsürtemi meranga jembitsüla aser nübortemi o dang jembia mekazüi mapa inyak tenzüksüla.

OLEMSABANG

Oshi meji Arogo netsüng ajemer.

~ S. T. Yapang Lkr, Kohima.

Tanü asen Nagalima telungzük nung Nagamese aser English oshi agi sayuba sentep timba züiner, arogo aser sentep züinbaji Khrista lima asünungji aji osang tajung, saka külen reprangdangra aji pei tetsü oshi junga mangatetba ajanga item sentepji longsutsür timba, ibai temzüng ka agi azüoktsüji tamakoktsü, pei oshi mashir timba timba küma aotsü, aji asenoki menoktangtetsü. Nagamese sentep süra tzümalongmar timba züiner, English sentep süra asen Naga nung pei oshi mangateterem timba longsur.

Tamalena lemsatepogo maneni leshir, asen nisungi agiba tetsür nem asen oshi shidaktsütsüji shibai agi pa khuret, aji par kinunger mesüra arogopur khuret masü, ano asen nisung tetsür shiba tangar kin den alir laia pei kinungbu oshiji angazüka pari keta asentsüsa alitsüji tim, ajisaka pei oshi mangatetbaj asen Aor dang masü Naga kin ajak nungi timba timba züiner, aser item pur meji sentep kidang pei oshi mejembii English mesüra Nagamese agi sayudi asünung aji sübusü ka ahdang sümeremsü ka shisa ama asütsü, kechiyong nisung ishika nem angatetdaksütsü merangdang mangateter timba asünungji Ao temeja jembiba sentep tenzüka aotsüa menua mali, anungji takoker Arogoibo joko oshi mashir lenji oa mapang balala lemsar mesüra taktang balaka süloker English agi sayuba sentep tenzük nung ang asen Aor arogo netsüng mesamatsü ta angateter. Arogo ka asoshi netsüng aika alitsüji tongtibangba masü Kotaki aotsüsa alibaji ang tongtibangba, saka ano netsüng melira Arogojia tasü.

Meimchir taküm ya, kentenmenü mali asübo, koda sülarna?

~ MISS MOLUNGNENLA LONGKUMER

Kentenmenü ajanga alima ajunga nung meimchir asoshi oshioben aser olaosü tebandang kecha maka, tesentaktep aser telungjem agütsür. Sobaliba telemsa maka, tanak temesüng, tila tulu aser takar sensaker ajak asoshi ken ola kasa ajaki meimer aser sapur. Alima nung yimsü balala shia, ken ajanga pei Tsüngrem tushir, külemer aser sentsüwangshidaktsür. Kentenmenü ya meimchir taküm ka asoshi oshi makaba ola, layakongki atemba, tawaba ola balala aser tsüngsanga atenba ken ajanga yimjung, tesünep aser telungjem teronem adoker. Meimchir taküm nung kentenba ola makara tazüngla aser teimla samadaksür. Ken ajanga tasü yipden nung shiranga alidang süneptsür, yirua aser temulung zürepa alirtem ajungmesor. Kentenmenü yagi taküm ka tanela ajungmesor aser temulungjang ateta atsünger aser yimsaodaksür.

Alima kin ka ayak (identity) ken ajanga sayur (anthem) aser lokti inyakyim balala, saisapong balala ajak kensü ola ajanga arakzüa kümdaktsür, alima aser tanelar benjong ajak nung kenten ola ajanga tenzük aser ayongzük. Kija taküm shia kentenba ola agi süngjema kümdaktsür. Kenten ola aser kongki ola balala agi meimchir taküm ka tanela, temulungsentsü, taküm yimya aser shisatsü ajak melenshidaksür.

Alima nung mongin teshiteter, ken meimer Germany nung Friedrich Nietzsche, pai yamai zülua toktsü "Without music, life will be a mistake" ya ajaki au ta agizükteter. Kentenmenü ola melira taküm kaji tazüngla aser aibelen tulu ka mesüka lir. Ken ya sayatonya inyaktetba tashi tulu ka mesük, jembiba aser sangoktsüba dang nungi angashiba olaji tejangjaba aser temenungratsü osang tekaraba agütsür. Ken ya teraksa mulungjang süneptsür tulutiba aser yimjung ronem agütsür tulutiba. Alima sobaliba balala tesüiba otsü ken ajanga bilemteta angazüker aser meimchir taküm yimya libaliru melenshia kümdaktsür.

Meimchir taküm ka asoshi tia tensa ajak nung kentenmenü anganüba aser meimba ya tesüngmangtsü.

Tsüngrem külemba nung ken ajanga sentsüwangshidaktsüba ya jangratemsü. Item ajak dak alaka, meimchir taküm ka asoshi Tsüngremer sempet tulutiba rongnung ken adokdaksüba aser agutsüba ya tesüngmangtsü temeim olura. Aji oda, meimchir taküm ya kentenmenü maka aser mali asübo koda sülarna?

Asenok ajaki alima nung ken ngutetba asoshi teyanglur Tsüngrem tenüng maneni sangdi.

(Iba ocet ya Changtongya Town Baptist Arogo nung lanurtemi küm nung khen adokba "Tebenjem Washir" 2023 kaket nungi agiteta adoktsür)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Hombarnü Life Spring Corner Dimapur nung Calvary Bible Institute Team North East indang Graduation Day amungdang tangokba noksa ka nung graduates aser ketdangsürtem angur.

Pakistan nung tamanger ka tai meliaka tepuokdak nungi mechioker

Lahore, Tsüklai/February 27 (Agencies): Tamangba yimsü mezügmeshi ta tai tonglokja Pakistan nung Catholic nung ka tepuokdak ita trok buba ayur, aser tebur kati police dang arishi küm 34 tain tanur tebu ya tamangba yimsü mezügmeshiba mapa meinyak ta shiaka mechioker.

Zimran Asim yagi yaria Quran tapak kar shisa aser tesem asem nung tamangba yimsü mezügmeshia o zülu ta tai tonglokja August 27 nung Counter-Terrorism Department aser police temi pa Chak No. 37 village, Sargodha District, Punjab Province nung apu aser par kinungertem ki yutsür jena aotsüsa akum.

"Künü anema tai tongloksüba ya khenyongi tai aser tamendak dak maka," ta tepuokdak alisang teti Zeeshan Asim-i Christian Daily International-Morning Star News dang ashi.

"Pa den külemi tai tonglokja alisangi pa kisüngi inyak ta nangzükaka tamangba yimsü mezügmeshiba ken o asem nung police temi tebilemba tamajung nung tai tongloksü."

Zimran Asim-i par kinunger dang ashiba agi, kidanger tamanger arishi küm 17 tain Akash Masih-i police dang July 16 nü tamangba yimsü mezügmeshiba aser Muslim nung yimdaklir temi August 16 nü Jaranwala nung tamanger ki ka aser business rongdokja auyaba sülen hopta ana tsüngta tamangba yimsü mezügmeshiba maparen pai inyak ta police dang nangzükogo. Police temi Akash ya CCTV footage ka nungi jangjatet, shiba kaket ayokba tesem ka nungi quranic booklet ka ali.

"Zimran ya Akash den külemi ken o nung züngoksem, kechiaser künü pai Akash ya pa indang motorcycle nung mener gas cylinder ka abeni kidanger yimsü kati ao," ta Zeeshan Asim-i ashi.

"Akash aputsü mech CCTV video nungi pa indang noksa agizüker bushiba mapang gas ayokeri pa ajitet aser police dang Zimran den tebursang külemi angu ta osang agütsü. Yamaji künu ya police temi apu."

Kinungertemi tepuokdak Zimran ajuru aser iba mapang Akash-i tamangba yimsü mezügmeshiba mapa inyak ta nangzükogo ta parnok dang ashi.

"Jaranwala nung Muslim nungeri Khristanpur reshikangshiba aser tekülem ki tem rongdoktsüba atema jashia liasü ta Akash-i police tem dang ashi. Akash-i iba maparen nung Zimran maden ta shiaka police temi ken o asem nung pa tenünga amshi," ta Zeeshan Asim-i ashi.

Asakh-i quranic pages shisaba aser tamangba yimsü mezügmeshia o züluba mapang Zimran Asim-i dangar ali-mali ladanga liasü ta bushisüngdang temi tai tongloksü, ta Zeeshan Asim-i ashi.

Akash aser Zimran Asim Sections 295-A, 295-B, 295-C aser 298-A kübok July 16, August 20 aser August 25 nü tatalokba asem kübok aitsü. Section 295-C, Islam tesayur Muhammad mezügmeshiba atema tasüba temerenshi agütsür.

"Police temi Akash anema kuli tejangja lir ta ashir saka künu shilem agiba atema kuli kecha mali. Pa tai maket ta police temi meteta lir, ajisüaka parnoki pa merenshir," ta Zeeshan Asim-i ashi.

Open Doors ajanga alima nung Khristanpur alitsü asoshi linük tamajungtiba asadanga 2024 World Watch List nung Pakistan ya jenjang tenet buba nung lir.

Pa apuba sülen Zimran Asim'er kinungertem par yimsü yutsür jena aotsüsa akum, kechiaser Muslim nung yimdaklir temi pa aser Akash ya tamangba yimsü mezügmeshir aser itdangiter ta sangdong.

"Muslim nunger temi Facebook nungi onok indang noksa agizüka social media group aser pages balala nung prokshia ozü kinunger ajunga takum lendongi yok," ta Zeeshan Asim-i ashi.

Muslim nunger temi onok indang ki rongdoktsütsü sentong yanglua liasü, saka police tem mapang shidak nung aruba aser yangji aliba tantsü-tambo temi tebilemba tamajung nung arurtem meindok ta pai ashi.

"Ozü ki rongdoktsütsü aliba nungi kumzükaka nisung kar ki telungi aita osettsüset auyaogo. Küboi auyaba indang ken o ka benoktsü merang, saka yangji aliba police tem yimya meshidaki meyiper kübo ang mezügmeshia liasü."

The Voice Society nungi Zimran Asim indang okatsür Aneeqa Maria-ia pa pua ayutsü police dak temeden kecha mali ta ashir.

"Zimran ya Akash'er kidanger asüba dak alaka pai mapa tamajung kecha inyaka mali. Police temi Akash anema kuli peria lir ta shiaka Zimran anema kuli kecha mali. FIR asemprong ya mejangjaba nisung anema benok, anungji kuli tejangja makai Zimran sendakteptsü police asoshi mapa temelaba akumer," ta Maria-i ashi.

Open Doors ajanga alima nung Khristanpur alitsü asoshi linük tamajungtiba asadanga 2024 World Watch List nung Pakistan ya jenjang tenet buba nung lir.

France sepiatem ainshiba sülen linük north tsütsü iba ama azüdokshi agi sünger lir ta Open Doors ajanga ashir.

Open Doors yagi alima nung Khristanpur reshikangshiba

asadanger aser kumzüka ayutsü meranger, aser parnoki ashiba agi Burkina Faso nung nisung 800,000 shi Islamist telungpur telok ka kübok tetsübo nung alir.

Open Doors ajanga alima nung Khristanpur alitsü asoshi linük tamajungtiba asadanga 2024 World Watch List nung Pakistan ya jenjang tenet buba nung lir.

asadanger aser kumzüka ayutsü meranger, aser parnoki ashiba agi Burkina Faso nung nisung 800,000 shi Islamist telungpur telok ka kübok tetsübo nung alir.

ANOGO ABEN TSÜNGREM DEN

Tsüngrem küboki iang

"Asangurtem, nenok tashi tait, aser Tsüngrem o nenok dak alir, aser nenoki tamajungba akok nung, ni nenok dangi zülu."

- I Yohan 2: 14.

Yohani Khristan tasentem dang tila tanurtem ta aja. Tain Temeshi nisung dang tambur ta aja. Tetsüngda nung alirtemji asangurtem lir. Parnok tain lunglung. Parnok teinyaktsü tongtibangji tamajungba nokdangtsüla.

Nai tamajungba madak takok mangu tashi ne mulung nung tesünep malitsü. Nai tekülakokdaktsüba den tarütsüba agi raratsü merangra tzü nung nok agi alepba amadang asütsü. Ashioktsüba tanela dang mangashi-i dokjang.

Laishibai asenok dang ochiba dang shimtsü ashir. Tesangwa dangi meyipba ajanga asenoki amangji remsepdaktsütsü akok. Tatidangbai na timtemdaksüra Tsüngrem dangi bener arung aser pa den telungjem akaba ajanga bentettsü merangang. Yakobi shitakba lenmangji tuyur; "Tsüngrem küboki aitang. Mojing nokdangang aser pai na nungi jena aotsü" (Yakob 4:7).

Asenok temulungsentsü atsüa ora, asenoki sarasademji masütsü ta satani metet. Sarasademji Tsüngremer leniba asoshi taküm aliba tesendaktep lir. Amang ajanga asenoki Tsüngrem den jajara asenoki Tsüngremi agutsüba tesünep angutsü, koba agi tangatetba ajak atentanga oa aser mulungjang nüka alitsü (Fil. 4:7).

Kibuba, Ne küboki ait nung dang ni tamajungba noktangtetter, Satan ni nungi jena odaktsüba aser Nai ni nüchi kümdaktsüba asoshi Ne tenüng asanger ta asenoki marendaki shidi.

Burkina Faso nung tekülem ki amakba sülen sarasademtsü ayongzüker

Dori, Tsüklai/February 27

(Agencies): Burkina Faso nung Deobarnü tekülem sentep agiba mapang Khristanpur nisung 15 tepsetba sülen sarasademtsü ayongzüker.

Diocese of Dori nungi Abbot Jean-Pierre Sawadogo-i ashiba agi, iba lendong agütsüdang nisung 12 idangjisa asü aser asem mozüki nung asü.

Burkina Faso north-east tsütsü Essakane yimdak Deobarnü tekülem sentong agiba mapang prangbong bena alirtem arua injang khaloktsü. Lendong agütsürtem ya Islamist telungpur südi ta amanger.

Sawadogo-i nüburtem dang iba lendong agi kongshir alir ajunga atema sarasademtsütsü ayongzüker.

"Tang iba temulung shirangtsü tensa nung, nenok ajak dang tamang nung asürtem asoshi, yirur alirtem taneptsü angutsü aser mang yima alirtem mulung süngzüktsütsü asoshi sarasademtsütsü ayongzüker," ta pai ashi.

Taoba küm iba linük nungi France sepiatem ainshiba sülen linük north tsütsü iba ama azüdokshi agi sünger lir ta Open Doors ajanga ashir.

Open Doors yagi alima nung Khristanpur reshikangshiba

asadanger aser kumzüka ayutsü meranger, aser parnoki ashiba agi Burkina Faso nung nisung 800,000 shi Islamist telungpur telok ka kübok tetsübo nung alir.

Open Doors ajanga asadanga alima nung Khristanpur alitsü asoshi linük tamajungtiba indang World Watch List nung Burkina Faso ya jenjang 20 buba nung lir.

Burkina Faso nung 2019 küm nungi jihadist temi mapa inyak tenzükba sülen azüdokshi tali akumer, ta Open Doors ajanga ashi.

"Burkina Faso nung tamangba yimsü talenba meliasü aser loktiliba tesendaktep junga liasü," ta Open Doors indang Sub-Saharan Africa odongtar Jo Newhouse-i ashi.

"Ajisüaka Islamic telungpur züinba ajanga Burkinabe nunger yimjung nung aliba amokmerener. Linük north tsütsü telungpur tali akumba ajanga Khristanpur dak tali kongshir, kong tekülem ki aser Khristanpur dak balaka tenük yoker lendong agütsür."

"Kasa mapang Islamic extremist telok tem den madenba Muslim nungeria timtem balala ajurur," ta Jo Newhouse-i ashi.

AO OSHI ANGAZÜKDAK:

TANÜ ANGAZÜKTSÜBA OJANG



Songsong

(n) Süchiri sü sendaka ayuba süng (post for tying mithun)

* Obalai songsong nung sü tuluka sendaka ayu.

Songtak

(v) Ali nung nü aser süng noktadaksüba (keep spear jabbed on the ground)

* Oboulai pa nü ali nung songtaka yur süngo jema amen.

OLONG PAITEP # 6711

Grid for OLONG PAITEP # 6711 with numbers 1-15 placed in specific cells.

TIPIEN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. ____ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. ____ kibur - (5)
13. Tebur tembar tsüngda jatepba - (4)

OLONG PAITEP # 6710 TELANGZÜBA

TIPIEN :

- 1. Semtu, 3. Lepko, 5. Bilem,
8. Ulu, 10. Tsüngpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER MA



Mumbai nung aliba Tata Memorial Hospital ajanga cancer tanaben madoktsü atema treatment ka bushitetba osang metetdaksüogo. Tata Institute ya India nung Cancer Research and Treatment Institute tajungtiba rongnung ka lir aser researchers o doctors-i küm 10 tashi bushitepa aruba sülen tablet ka yanglutetogo ta ashir. Iba mozü ajanga shirangertem dak cancer tanaben madoktsü aser radiation o chemotherapy amala side effects 50% ajema kümdaktsütsü ta Tata Memorial Hospital nung senior cancer surgeon Dr Rajendra Badve-i metetdaksü.

Congress lennir teimba kati BJP den tongteper: Minister Pijush Hazarika

Guwahati, February 27, 2024

(Agencies): Congress lennir kar dak alaka teimba kati Bharatiya Janata Party (BJP) den tongtepratepar ta Minister Pijush Hazarika-i ashi.

Ajisüaka pai iba dak sendakba osang talila kecha mashi.

"Temeim Jitendra Singh Rakibul Hussain, Rekibuddin Ahmed, Zakir Hussain Sikdar aser Nurul Huda nunger dak alaka tanüngba INC Assam lennirtem/MLA temi onok den osang agitepar" ta Hazarika-i ashi. Assam Congress in-charge Jitendra Singh Alwar-i post asüba atema pai iba telangzüba agütsü. Mapang tatsüka tsüngda

tenüngtem metetdaksütsü aser tanüngba lennirtemi tanga party tem nung adentsü, ta Minister Hazarika-isa ashi.

"Chief Minister Himanta Biswa Sarma aser BJP-i Leader of Opposition aser CLP leader Debabrata Saikia anir aotsü meranger" ta Congress party Assam in-charge Jitendra Singh-i ashiba sülen pai iba osang metetdaksü.

Himanta Biswa Sarma-i Saikia BJP nung anioknür aser pai Saikia tetsü den ajurutepnür, ta Hazarika-isa ashi.

"CM Himanta Biswa Sarma-i Congress lennirtem atsür aotsü meranger aser iba jagi pai ozü

CLP lennir Debabrata Saikia tetsü den ajurutepa pa BJP nung dendaktsünür" ta Jitendra Singh-i ashi.

Assam CM-i voters rongnung beneficiaries adokdakja BJP atema votes bendener ta paisa ashi.

"Otsüsütsü aketba Bharat Jodo Nyay Yatra raksatsütsü atema CM Sarma-i BJP inyakyim ama Assam nung yatra anogo agidang tetsütem aser adianutsürtem Lakapati Baideo scheme indang forms nung züludaktsü. Iba olulu ya tetsürtemi temai adokdaksü aser parnoki Rahul Gandhi den ajurutepa yatra moatsü" ta Jitendra-isa metetdaksü.

CoTU-i Centre dang Imphal valley nung AFSPA benoktsü akhanger

Imphal, February 27, 2024

(Agencies): Manipur nung lisopur telok Committee on Tribal Unity (CoTU)-i Centre dang Imphal Valley nung armed forces special powers act (AFSPA) benoktsü akhanger.

CoTU-i union home minister Amit Shah dangi züluba memorandum ka nung tawa Manipur sorkari police transfer & posting tetuyuba meyipa

agidakjang ta shiogo.

CoTU-isa Amit Shah dang Imphal valley kübok police stations 19 nung AFSPA tanaben benoktsü mepishiogo.

Kangpokpi district nung deputy commissioner (DC) ajanga parnoki Union Home Minister dangi memorandum yok.

February 14, 2024 nü police officers/personnel transfer & posting asüba aser talisa iba nung

Kuki-Zo police personnel 108 densemba atema tebilemtsü abener. Kin o kin rara adoka lia iba ama inyakyim ya shisa metongi inyakba lir ta CoTU-i ashi.

Kuki-Zo civil aser police officers-i parnok mapa tiptema meinyakter aser police personnel 108 tashi Imphal nung oa mapa inyaktsübaji tim masü ta parnokisa metetdaksü.

Advertisement for CIO (Council for Insurance Ombudsmen) featuring logos, text in Hindi and English, and a warning about insurance policies. Includes QR code and website information.

Taruba Hombar tashinung Israel-Hamas ceasefire imlar: Biden

Washington, Tsüklai/February 27 (Agencies): Gaza nung Israel aser Hamas tsüngta raraba nung Hombar tashinung ceasefire ka alitsü imlar, ta US Tir Joe Biden-i ashi.

Israel aser Hamas ketdangsürtem dena yimjung ken o jembiba nung terenlok tera lir ta osangtem aruba mapang ka nung pai iba o ya ashi.

Iba nungya Gaza nem teyari agütsüsü aser October 7 nü Hamas teloki amakdang pua bener aortem chiochtsü dena lir.

Israel-i sangdong kecha agüja mali aser Hamas ketdangsür temi telok ana tsüngta Biden-i ashiba ama ceasefire atema jembiba balaka malia sayur.

Hamas teloki Israel south tsütsü nisung 1,200 shi tepsetba sülen Israel-i anünglen aser aline nungi Gaza maka arur.

Hamas telok yagi nisung 253 pua bener ao aser aika chiockogo.

Gaza Strip nung Hamas teloki ketdang asüba health ministry ajanga ashiba agi, tang tashinung yangji nisung 29,878 tepsetoho aser item rongnung tesüiba ghonda 24 tsüngta nisung 96 asüba densema lir, aser nisung 70,215 yiru.

Rara anentsü asoshi

jembishinüba nung Egypt, Israel, Qatar aser US nungi ketdangsürtemi shilem agir.

France-i yangluba draft framework ya Hamas-i tang tashi asadanger, kong military operations ajak anogo 40 atema anena atatsü aser Israel nunger pua alirtem chiochtsü mechi Israel tepuokdak Palestine nunger yua aliba chiochtsü dena lir.

"Onok anasai aor. Asenok ano metembang. Taruba Hombar tashinung ceasefire ka alitsü kü teimla lir," ta Tir Biden-i osangbener dang Hombar nü ashi.

Tezüngzüktep ka agitetra Ramadan mapang rara anena atatsü Israel-i mulungtsü, ta pai ashi.

Islam nunger temeshi ita ya March 10 meta tenzüchtsü.

"Ramadan tonga arur aser pua alirtem anitettsü asoshi mapang agüja Ramadan mapang inyakyim kecha malitsü atema Israel nungeri tezüngzüktep ka yanglur," ta Biden-i ashi.

Ajisüaka Hamas ketdangsür kati, "Hamas nung onok asoshi tongtipangtiba mapaji pua alirtem melenteptsü masü saka rara anentsüba ya lir," ta BBC dang ashi.

Gaza nung tangsa ceasefire alitsü atema takangba agüja UN Security Council nung taoba hopta pangzüng ka benokba Israel tembar US-i agientsüba atema linük balalai aitsü. Iba melena parnoki khen atema ceasefire ka asoshi pangzüng ka benok aser yangji Israel dang Gaza south tsütsü Rafah yimti mamaktsü shia liasü.

Linük balalai Israel dang Rafah mamaktsü ayongzüker, kong Palestine nunger million 1.5 jenoka lir.

Ajisüaka Israel Ato Kilonser Benjamin Netanyahu-ibo kechi südir süaka Rafah ya amaktsü ta ashir.

MULUNGNEN

"Kechiaser ni asoshi takum alibaji Khrista aser tasütsüji tajangzük." Filipi 1:21



07.08.1947 - 22.02.2024

Onoki teti meima aliba tsürabur Chubanungsang (Lakhuni) shirangba mapang nungi tasünü tashi lokti, kija, adianu aser temeimertem shirmokisa nübu, rongsen, shisatsü aser tamang sarasadem agi yariogo, nenok ajak dang kanga pelaba lemsateper. Ozüi kecha meyipa agütsüsü mali, saka takar Tsüngremi nenok mapa tajung asoshi moajang ta sarasademtsür.

Temeim Kinungtsü, Chirnur, Semchisemnur, Kinunger aser Anükapang.



GOVERNMENT OF NAGALAND DIRECTORATE OF TECHNICAL EDUCATION

0370-2270409
0370-2271432

Nagaland : Kohima - 797004

NO.DTE/SCTE/6/2023-24/5648/

Dated, Kohima the 26th February, 2024

NOTIFICATION

NO.DTE/SCTE/6/2023-24: Interested Candidate are hereby informed to fill up the Prescribed Application Form to undergo 3 (three) years Diploma Courses in State run Polytechnics for the academic session 2024-25 w.e.f. 1st March till 30th March 2024 which will be issued from the office of the undersigned as well as DEE Exam Centres during office hours on all working days till 30th March 2024. Candidates who have appeared HSLC/HSSLC final examination of 2024 are also eligible to apply for the Diploma Entrance Examination. However, they will have to submit necessary documents within stipulated time period and fulfill all criteria for selection to study Diploma Programme.

Last date for submission of filled application Form to the office of the undersigned or DEE Exam Centres is 30th March, 2024. Application Form and Prospectus may also be downloaded from the website <https://dte.nagaland.gov.in>, in which case the fee of Rs. 300/- (Rupees Three hundred) only may be deposited while submitting the Form.

Programmes offered in the Polytechnics.

Sl. No.	Name of Polytechnic	Program Offered	No. of Seats	Minimum Qualification
a	b	c	d	e
1	Khelhoshe Polytechnic, Atoizu (KPA) & DEE Exam Centre	Civil Engineering	60	HSLC/10+ passed in Maths & Science
		Mechanical Engineering	30	
		Electrical & Electronics Engineering	30	
		Automobile Engineering	30	
2	Institute of Communication & Information Technology, (ICIT), Mokochung & DEE Exam Centre	Computer Engineering	15	
		Electronics & Communication Engineering	8	
3	Government Polytechnic, Seithekema 'C' Chumoukedima & DEE Exam Centre	Civil Engineering	30	
4	Government Polytechnic, Sedem, Tuensang & DEE Exam Centre	Civil Engineering	30	
5	Government Polytechnic, Tsunazho, Chetheba, Phek	Electrical & Electronics Engineering	30	
6	Government Polytechnic, Aboi, Mon & DEE Exam Centre	Civil Engineering	30	
7	Government Polytechnic, Kohima (GPK) & DEE Exam Centre	Civil Engineering	30	
		Computer Science & Engineering	30	
		Fashion Technology	30	HSLC/10+ Passed
8	Government Polytechnic, Doyang, Wokha	Architecture Assistantship	15	HSLC/10+ passed with Maths & Science with aggregate of 55% (or) HSSLC/12+ (Science) passed with Physic, Chemistry & Maths (PCM) with aggregate of 50%
9	Government Polytechnic, Peren	Interior Design	15	

Sd/-
(ER. VIPULHOU LHOUNGU)
Director

Guinea nung military sorkar anema longkak ait; nisung 2 khaset

Conakry, Tsüklai/February 27 (Agencies): Guinea nung Hombar tashinung military sorkar anema open-ended general strike ayongzüker mezüngbuba anogo linük yimtiba Conakry nung lanur ana khaseta liasü. Guinea nung military-i sorkar atsünga 2021 küm nungi yimsüsü arudar.

Union tongtitemi nüburtem aser private sector tem dang nüngtugu osangbener ka chiockdaksütsü, chiyongtsü nung jenjang tajemba kümdaksütsü aser media censorship anendaksütsü khanga longkak aitsü ayongzüka liasü.

Hombarnü lanurtemi tongtibang lenmangtem nung tenokdangba balala tokja longkak ait tenzüka sülen Conakry nung school, dokan, shishilembadak aser lenmang ajak tazüng liasü aser mozükitem nunga skeletal services dang agüja liasü.

Iba sülen tesem ishika nung longkak aiter aser security force na tsüngda mangatettep adok aser iba mapang lanur ana khaseta liasü.

"Parnoki ozü jabaso khaset, parnoki pa dak rangloker aser tekong nung khalokja liasü," ta security forces den mangatettep adokba mapang asür rongnung ka indang kinunger Adama Keita-i AFP news agency dang ashi.

Iba tatalokba indang ya tenük kuli agütsürtem aser police source katia meima jangjatsüogo

"Ni asangur chaun ka marakzüi aliba tasümgang

nguogo. Ni pa ngur nüktzü tsünganga liasü, ajisüaka iba amala inyakyim nung medensütsü atema ni iba tesem toktsür oadok," ta police source kati AFP dang ashi.

Maneni tanga tesem ka nung security force tem den mangatettep adokba mapang ano asangur chanu ka khaseta liasü, koba pa asüba mozükidang nungi doctor kati AFP dang shia liasü.

Hopta ka tejakdang dang military-i mimlai lia ajungbena 2022 küm July ita nungi inyaksangshia aliba transitional sorkar loksatsüba sülen logkak ait tenzüka liasü. Parnoki sorkar kechiba loksatsü iba indang osang tejangja mesüra kodang amenoktsü iba indang osang magütsü.

Military-isa, sorkar tenzükertem indang passports meshia ayutsü aser parnok indang bank account tem tamshi mejungi kümdaksütsü atema tetuyuba agütsüogo.

General Mamady Doumbouya kübok Guinea nung longkak aitba sentong ya aibenbo ayongzüka magir. Pai anir military-i 2021 küm September ita sorkar atsüngtoka military sorkar amenoka liasü.

Doumbouya-i, taküm küm tenzüka sülen yimjak nung khen danga jembia mali. December ita linük indang oil depot tongtiba nung lendong ataloka nisung ti tashi asüba aser Guinea ajunga hopta aika lemtar liaka pai kecha telangzüba magütsü.

(Maneni tapak 8 nung...)

NE Olympics atema Wushu coaching camp ayonger



3buba Nagaland Olympics and Paralympic Games mapa Wushu asayartem tangokba noksa nung angur.

Kohima, Tsüklai/February 27 (TYO): Nagaland Wushu Association-i sangdong ka ajanga, 3buba Northeast Olympic Games masaya tsüngda February 28 nungi tenzüka intensive preparatory camp ka agitsü aliba atema asayartem tenüng sangdongogo. Iba asayamung ya March 18 nungi tenzüksü.

Kasa sangdong ajangsa Nagaland Wushu Association-i, Chumoukedima district nung training agitsü atema association-i silver aser gold medal angurtem shimogo, ta metetdaksü.

Camp akaba sülen state tenüng nungi NE Olympics nung asayatsü atema asayar

tajungtiba shimtsü. Iba dak sendakba nung shima aliba asayartem dang training tenzüksü atema February 28 nü 12 ako nung Tetso College, Chumoukedima district anasa DUDA guest house tonga arutsü metetdaksüogo.

Asayartem ya: 52kg category nung Vipu Zhimomi aser Wapang Ao; 80kg nung Lipokjonshi Imchen; Mankho T Konyak aser Meidan I Phom na 56kg; Aboto Ayemi aser Nupa Kiho na 60kg; Emtiramok Amri aser Akivito na 65kg, Kekhrieneitso Angami aser Nchumthung Tungoe na 70kg; Temsu aser Yoto Chizo na 75kg.

Tetsür asayartem rongnung;

45kg nung Bwensinsha Seb aser Temsurenla na; 48kg nung Geeta Narjinary aser Mahima Mech o Kivikali na 52kg category nung asayatsü.

NEOG nung asayatsü aliba asaya 16 rongnung Wushu-a ka lir. Iba asayamung ya Nagaland kübok district asem nung asayatsü. Wushu asaya ya teburtem 52kg, 56kg, 60kg, 65kg, 70kg, 75kg, aser 80kg category nung asayatsü aser tetsürtem 45kg, 48kg, aser 52kg category asayatsü. Wushu asaya dak sendakba nung osang tejangjaba aginüa lira item number +919612111544 or +917630994233 nung tongteprateptsü, kasa sangdong ajanga metetdaksüogo.

Jan Nicol Loftie-Eaton-i T20I nung century takaratiba yangluogo

Tsüklai/February 27 (Agencies): Namibia nunger asayar Jan Nicol Loftie-Eaton-i, T20 Internationals (T20Is) nung century takaratiba yanglua Cricket asaya puti otsü nung pa tenüng züngoksemogo.

Pai Nepal den asayaba mapang ball 33 nung century yanglua iba otsü tasen yanglua liasü.

Nepal Tri-Nation T20I series nung asayamung ayongba linük den asayaba mapang Namibia team-i asaya junga metenzüktetba sülen Loftie-Eaton-i kanga junga

asaya par team jenjang kanga junga kümdaksü.

Namibia team-i over 11 nung asayar 3 out sür run 62 yanglur aliba mapang Loftie-Eaton batting ameni ait aser pai kanga junga asaya Namibia team-i run 200 dak tema yangluba nung teyari tulu agütsü.

Asaya nung Loftie-Eaton-i, four 11 aser six 8 züka ball 33 nung century yanglua liasü. Iba record ya Nepal nunger asayar Kushal Malla-i bener liasü, shibai taoba küm Mongolia den asayaba mapang ball 34 nung century yanglua liasü.

Loftie-Eaton-i kanga junga asayaba sülen Namibia team-i over 20 nung asayar 4 out sür run 206 yanglua liasü. Nepal nunger batsmen tem rongnungi Rohit Paudel, Kushal Malla, Dipendra Singh Airee, aser Sompal Kami nunger densema batsmen temi kanga meranga asaya ajisüaka parnok run 20 agi memenepe asaya makok.

Batting junga amenba dang masü Loftie-Eaton-i bowling-a kanga junga ona wicket ana agia liasü. Pai lenla ajak nung kanga junga asayaba sülen pa nem Player of the Match award agüja liasü.

Uganda International Challenge: Kashyap, Arjun MR-Dhruv Kapila nungeri takok tajung nguogo

Tsüklai/February 27, 2024 (Agencies): Uganda International Challenge tetsür kija asaya final nung India tsür badminton asayar Aakarshi Kashyap-i külem India tsür Shruti Mundada koka title benogo, ajisüaka Raghu Mariswamy-ibo tebur kija asaya final mekokteti tanabuba jenjang nung tembanga liasü.

Final asaya nung Aakarshi-i kanga meranga asayar ang Shruti 25-23, 21-18 agi koka

liasü. Tena tsüngda minute 48 asaya.

Kasa mapang nung tebur kija asaya final nung Mariswamy-i Vietnam nunger asayar Le Duc Phat 21-18, 21-14 agi mekoki liasü.

Tebur tarep asaya nung India nunger tarep Arjun MR aser Dhruv Kapila nati America nungr tarep Vinson Chiu aser Joshua Yuan na ayong ayonga koka liasü. Tenati iba asaya 21-14, 21-13 agi minute

30 nungdang koka liasü.

Ajisüaka tarep temeyoktep asaya nunga India nunger tarep Sathish Kumar Karunakaran aser Aadya Variyath nati final asaya kanga meranga asayar set asemubaba nung kokogo.

Tenati Australia nunger tarep Kenneth Zhe Hooi Choo aser Gronya Somerville na 22-20, 18-21, 21-19 agi koka liasü. tarep ana tsüngda asaya ghonda ka ser minute tenet asaya liasü.

BENDANGLI OSANG : Tapak 7 nungi...

Guinea nung military sorkar...

Military lenirtemi 2022 küm longkak aitba sentongtem ayongzüka magitsü atema tenokdangba agüja liasü aser opposition lenir, lokti tentet balala züngsemtem aser osangbenertem aika puogo.

Media outlets tem aziüoka aoba mapang television channel tem agintsüogo aser radio frequencies tema minpronga arudar.

Kasa mapang nung Union-i, Union of Press Professionals of Guinea (SPPG) secretary-general Sekou Jamal Pendessa tangsa tang chioxtsü khanga arudar. Pa ya January tatemlen temelaba magütsüba longkak aitba sentong ka nung shilem agiba atema pua liasü.

Pendessa küm trok tepuokdak ayutsü atema

Hokolbarnü obendang agütsüogo, ajisüaka küm asem atemabo taitok agütsüogo.

Union temi longkak aitsü sentong aliba sangdongba sülen, ita asem tejakdang internet amshitsü atema tenokdangba agütsür alibaba taoba hopta aginja liasü.

Sorkar tenzükertemia tang longkak aita aliba sentong ya pusema arudar.

"Iba longkak aitba sentong ya agizüker. Iba ajanga ketdangsürtem nem parnok ya alima nung tsüngrem masü ta angatetdaksütsü. Ni longkak aitba sentong nung densema lir, kechiyong lenirtemi adokdaksütsü timtem tekangshitem agi Guinea nungertem laktetogo," ta ministry ka nung ketdangsür kati ashi.

Hockey India CEO Elena Norman mapa nungi anenogo



Tsüklai/February 27, 2024 (Agencies): Hockey India nung maneni mepetmesü adoka CEO, Elena Norman-i Mongolbarnü la mapa toktsüogo. Lai iba mapa küm 13 tashi inyaka liasü.

India tetsür Hockey team coach Janneke Schopman-i, national federation-i la akümtsübu masü aser aser sentisüa mamshi ta shia mapa toktsüba sülen anogo ka lir Norman-ia mapa toktsüogo.

Hockey India tir aser taoba mapang India captain Dilip Turkey-i, Norman indang shiti agizükba mapang la dang kanga pelaba lemsatepa liasü.

"Hockey India tir ama dang masü saka taoba mapang asayar ka aser hockey asaya meimer ka ama ni lai taoba küm 12-13 tashi bendanga agüja inyakba atema kanga pelaba lemsateper," ta Turkey-i ashi.

"Lai kanga nendaka bendanga agüja inyakba ajanga Hocket India aser India nung

Hockey asaya tejakdangi renloka aoba nung tongtibang shilem agiogo. La tarutsü nunga takok nguyonga aotsü imlaja atar," ta Turkey-isa shisem. Lai CEO mapa bena aliba mapang linük tetsür aser tebur team-i world rankings nung jenjang tajungtiba tongteta liasü.

Kasa mapang nung küm 41 sülen India tebur team-i Tokyo Olympic Games nung bronze medal anguba ya tongtibang takok ka liasü. Iba asayamung nung tetsür team-a pezübuba nung tembanga liasü.

La HI nung inyaka aliba mapang HI-i 2018 aser 2023 küm FIH Men's World Cup, 2016 aser 2021 küm Junior Men's World Cup aser Hockey India League (HIL) pongu tashi ayongzüka asayaogo.

Iba dak alaka HI-isa, Champions Trophy, 2015 aser 2017 küm World League Finals, 2019 aser 2024 küm Olympic Qualifiers aser Hockey Pro League ayongzüka asayaogo.

BILEMDANGANG

"Na kong ajungmesor idakji mapang intokang."